



Aqqalu C. Jerimiassen

UKA 2022/24

Atassut

05. oktober 2022

**Uunga siunnersuut: Akileraaruserinermik ingerlatsineq pillugu Inatsisartut inatsisaata allangortinneqarneranik Inatsisartut inatsisaat.**

(Aningaasaqarnermut Naligiissitaanermullu Naalakkersuisoq)

Uani saqqummiunneqartumi pineqartut taalluaannarlugit, tassaagunarput Facebook-ikkut tuniniaasartut. Aaqqiissuteqarniarneq, aap paasinarpoq. Mianerisassaqaarsorinarporli taamannak inatsisikkut aaqqiissuussiniarnermi, inuimmi ataasiakkaat qanoq sumilu sulerineri marsingassanngortissagaanni ilumut tunngavisumik inatsisikkut illersungaanermut kallugutinnginnersoq paaserusunnarmat.

Aaqqiissutissamillu ima ittumik suliaqarniartillu, eqqaamasariaqarparput, inuiaqatitta ilaannai aaqqiissuteqarfiginiartussaannnginnatsigit. Ilumoorpoq, isertuunneqarsinnaanngimmat maanna, annertoqisumik nittartakkakkut kikkut tamat naapittarfiisigut tuniniaanerit imaanginnalivissimmamata, aningaasarpassuarnillu kaaviaartitsiffiulersimallutik, ilaannut allaat inuuniutitut atorneqalersimallutik, assersuutingalugu qilattakkaminnik kaagiliaminnilluunniit tuniniaasut. Taakkuinnaanngillalli, suli kikkut tamat nittartakkakkut naapittarfii atorluangaalinngitsulli, piniarnikkut piniakkanik killilersukkanik pisanik tuniniaasarnerit ingerlalluartaqaat.

Ilaatigullu assersuutaannanguamik tigusilaaraanni, tassalu kattuffiit pingasuusut ilaannit KNAPK-mut ilaasortat akiliuteqartarnerat qimerloorluaraanni, isertitat tamarluinnapajaamit aalisarnerminngaanniit isertitaammata.

Assersuummillu tiguseqqilaaraanni, takujuartarparput nunaqqatigut nittartakkakkut kikkut tamat naapittarfiisigut, imaluunniit silatiminni toqqaannaq mattaarniartut. Akileraartussaataitaanikkut tamakku qanoq eqqummaariffigineqartiginersut tamakkiisumik isiginiarneqarnerisooq qularnarpoq. Tassami akileraartarnermut Akileraartarnermut Aqutsisoqarfik eqiterullugu sumiiffinnut ataasiakkaaginnarnut inississorneqareermalli, sinerissap sinnerani “qenertumik” aningaasarsiornerup akiorniarneqarnera ajornakusoorsinnaasoq qularnanngimmat.

Uani paasiniarneqassanngilaq, ilaannut pasinarsaarinerimik oqaaseqartugut Atassummi. Aaqqiissutissalli suliariniarnerini illuinnaanut aaqqiisoqannginnissaa kissaatigiinnarparput, taamaattumillu uuma siunnersuutit suli ataatsimiitsitaliami nalilersorneqaqqittariaqarnera pisariaqaarsorinarluni.

Taamatut oqaaseqarluta, Atassummiit siunnersuut aningaasaqarnermut akileraartarnermullu ataatsimiitsitaliamut innersuupparput.